

Broj: 04-25-965/2022
Sarajevo, 26.08.2022. godine

Bosna i Hercegovina
Federacija Bosne i Hercegovine
**PARLAMENT FEDERACIJE
SARAJEVO**

B-8

**PARLAMENT FEDERACIJE
BOSNE I HERCEGOVINE**

- Predstavnički dom -
gosp. Mirsad Zaimović, predsjedavajući ✓

- Dom naroda -
gosp. Tomislav Martinović, predsjedavajući ✓

Primijeno: 26-08-2022			
Org. jed.	Broj	Priloga	Vrijednost
01,02	- 25 -	1700	22

Poštovani,

Na osnovu člana 208., a u vezi sa članom 172. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08 i 26/20) i člana 205., a u vezi sa članom 164. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), radi razmatranja i usvajanja po skraćenom postupku, dostavljam Vam **PRIJEDLOG AUTENTIČNOG TUMAČENJA ČLANA 7. ZAKONA O FEDERALNIM ROBNIM REZERVAMA** („Službene novine Federacije BiH“, broj 46/99), koji je utvrdila Vlada Federacije Bosne i Hercegovine na 328. sjednici, održanoj 25.08.2022. godine.

Prijedlog autentičnog tumačenja se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



PREMIJER
Fadi Novalić

Prilog: kao u tekstu na bosanskom jeziku

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**AUTENTIČNO TUMAČENJE ČLANA 7. ZAKONA O FEDERALNIM ROBNIM
REZERVAMA ("Službene novine Federacije BiH", broj: 46/99)**

Sarajevo, august 2022. godine

**PRIJEDLOG ZA DONOŠENJE AUTENTIČNOG TUMAČENJA
PO SKRAĆENOM POSTUPKU**

Na osnovu člana 213., a u vezi sa članom 172. Poslovnika Predstavničkog doma Parlamenta Federacije BiH ("Službene novine Federacije BiH", br. 69/07, 2/08 i 26/20) i člana 210., a u vezi sa članom 164. Poslovnika o radu Doma naroda Parlamenta Federacije BiH ("Službene novine Federacije BiH", br. 27/03, 21/09 i 24/20), Vlada Federacije BiH predlaže Parlamentu Federacije BiH donošenje autentičnog tumačenja člana 7. Zakona o federalnim robnim rezervama po skraćenom postupku, obzirom da se ne radi o složenom i obimnom propisu.

Na osnovu člana 212. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07, 2/08 i 26/20) i člana 210. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03, 21/09 i 24/20), Parlament Federacije Bosne i Hercegovine je, na sjednici Predstavničkog doma, održanoj _____. godine i na sjecnici Doma naroda, održanoj _____ godine, donio

AUTENTIČNO TUMAČENJE ČLANA 7. ZAKONA O FEDERALNIM ROBNIM REZERVAMA ("Službene novine Federacije BiH", broj: 46/99)

1. Pravo pristupa programima na osnovu kojih se obavljaju poslovi federalnih robnih rezervi imaju i ovlašteni zaposlenici u Uredu za reviziju institucija u Federaciji Bosne i Hercegovine, pri obavljanju dužnosti i u okviru radnih zadataka iz nadležnosti Ureda za reviziju institucija u Federaciji Bosne i Hercegovine, u skladu sa propisima i procedurama za pristup vrlo tajnim dokumentima.
2. Autentično tumačenje predstavlja integralni dio teksta ovog zakona, te se shodno primjenjuje od dana primjene Zakona o federalnim robnim rezervama i bit će objavljeno u "Službenim novinama Federacije BiH".

Broj: _____

Datum: _____

Predsjedavajući
Predstavničkog doma
Parlamenta Federacije BiH

Predsjedavajući
Doma naroda
Parlamenta Federacije BiH

**OBRAZLOŽENJE
PRIJEDLOGA AUTENTIČNOG TUMAČENJA ČLANA 7. ZAKONA O
FEDERALNIM ROBNIM REZERVAMA**

I. - USTAVNI OSNOV

Ustavni osnov za donošenje ovog autentičnog tumačenja je sadržan u odredbama člana IV.A.20.(1)d), u vezi sa članovima III.2.e) i II.A.2.1) Ustava Federacije BiH. Parlament Federacije BiH je, u skladu sa ustavnim ovlaštenjima, donio Zakon o federalnim robnim rezervama ("Službene novine Federacije BiH", broj: 46/99) i jedino je tijelo koje može (autentično) tumačiti njegove odredbe.

II. - RAZLOZI ZA DONOŠENJE AUTENTIČNOG TUMAČENJA

Odredba člana 7. Zakona o federalnim robnim rezervama glasi:
"Poslovi federalnih robnih rezervi obavljaju se na osnovu srednjoročnog programa od pet godina i godišnjeg programa.

Programi iz stava (1) ovog člana su državna tajna."

Osnovni razlog za donošenje autentičnog tumačenja jeste nedovoljno jasno i precizno definirana mogućnost pristupa podacima koji imaju oznaku državne tajne u smislu Zakona o zaštiti tajnih podataka Bosne i Hercegovine, zaposlenicima Ureda za reviziju institucija u Federaciji Bosne i Hercegovine.

Naime, čl. 39-41. Zakona o reviziji institucija u Federaciji Bosne i Hercegovine propisano je

"Član 39.

Ovlaštenja Ureda za reviziju u prikupljanju informacija

- 1) Ured za reviziju može pismeno zahtijevati od revidirane institucije da u određenom roku dostavi:
 - a) bilo koju informaciju,
 - b) bilo koji dokument ili informaciju, uključujući podatke u elektronskom obliku, koji ta institucija čuva ili je pod njenom kontrolom.
- 2) Ured za reviziju može zahtijevati:
 - a) da se informacije ili odgovori na pitanja daju usmeno ili pismeno,
 - b) da informacije ili odgovori na pitanja budu verificirani pismenom izjavom ili potvrdom.
- 3) Izjava ili potvrda je garancija da su informacije ili dokazi koji se daju istiniti i da ih Ured za reviziju može koristiti.
- 4) Revidirana institucija dužna je pridržavati se odredbi iz ovog člana.

Član 40.

Pristup prostorijama i dokumentaciji

- 1) Revizori imaju pravo:
 - a) u bilo koje razumno vrijeme ući u bilo koju prostoriju koju koristi revidirana institucija,

- b) u bilo koje razumno vrijeme na potpun i slobodan pristup bilo kojem dokumentu ili drugoj imovini,
 - c) pregledati, kopirati ili uzeti izvode bilo kojeg dokumenta.
- 2) Revizor nema pravo ući i zadržati se u prostorijama, ako na zahtjev njihovog korisnika ne predoči pismeno ovlaštenje.
 - 3) Pismeno ovlaštenje znači ovlaštenje Ureda za reviziju potpisana od generalnog revizora ili zamjenika generalnog revizora da je revizor ovlašten za obavljanje takvih aktivnosti.
 - 4) Ako revizor uđe ili predloži da uđe u prostorije, njihov korisnik dužan je revizoru osigurati sva razumna sredstva za uspješno izvršenje aktivnosti iz ovoga člana.

Član 41.

Ovlaštenje za prikupljanje informacija koje ne ograničavaju drugi zakoni

Ovlaštenje iz člana 39. i 40. ovoga Zakona se ne ograničavaju ni po kojem drugom zakonu.”

Imajući u vidu da odredbama Zakona o federalnim robnim rezervama nije precizno određen pristup dokumentima koji imaju oznaku povjerljivosti, što su u konkretnom slučaju srednjoročni program od pet godina i godišnji program na osnovu kojih se obavljaju poslovi federalnih robnih rezervi, a da su poslovi federalnih robnih rezervi od posebnog interesa za Federaciju, te da navedeni programi predstavljaju državnu tajnu, te da Zakon o reviziji institucija u Federaciji Bosne i Hercegovine također ne precizira način pristupa dokumentima sa oznakom stepena tajnosti, s ciljem ispravnog postupanja, smatramo da je isto potrebno decidno definirati.

III. - OBRAZLOŽENJE AUTENTIČNOG TUMAČENJA

Tačkom 1. autentičnog tumačenja se tumači da pravo pristupa programima federalnih robnih rezervi imaju i ovlašteni zaposlenici Ureda za reviziju institucija u Federaciji Bosne i Hercegovine.

Tačkom 2. je određena primjena navedenog autentičnog tumačenja.

IV. - FINANSIJSKA SREDSTVA

Za provođenje ovog autentičnog tumačenja nisu potrebna sredstva iz Budžeta Federacije BiH.